

各位評判先生，各位同學大家好，捱係第○號，今嘅日捱愛朗讀個題目係【覓蜆仔¹】

張美容

「黃金蜆！黃金蜆！愛買兜仔無？對肝盡好哦！」市場個魚販仔見看著人過，就招人買，佢看著篩仔肚一隻隻金黃金黃個蜆仔，就想著細人仔時節覓蜆仔個情景。

在鄉下，覓蜆仔係細人仔最好個事情，一方面有正當個理由好搞水，一方面在該食著²無恁豐湧個時代，又有好做菜，故所在祭日，鄰舍湊啊著就共下去覓蜆仔。係有較大個人帶，吾姆成時也肯分佢珍等去，佢像飛出鳥籠個鳥仔，緊行緊跳，暢到耐毋得，這下想起來，嘴丫角還會慢慢弛起來。

這群覓蜆仔個人，實在生趣，有個一隻手拗盆仔、一隻手拿篩箕，盆仔肚還愛放一枝細沙耙；有個一隻手拗鑊仔、一隻手拿畚箕，鑊仔肚還愛放一枝細鑊頭，大家斯驚東西毋罅齊³，覓個蜆仔毋罅多。吾屋下無這兜傢伙⁴，帶個東西盡簡單，一頂笠嫲抵日頭、一隻細盆仔張蜆仔，就恁樣定定。

佢兜盡輒去個位所，係就近個大圳溝，這條圳溝有兩、三公

尺闊，水到膝頭下恁深。落到圳溝肚，佢用手抔起圳溝底個泥沙，目珠金金看裡背有蜆仔無，係有就煞煞拈起來，像著著獎券⁵恁暢。跔忒久，腰骨痠軟吔，就企等用腳蹕，蹕過，等水鮮，就會看著圍在圳溝底個蜆仔走出來，一晝邊⁶下來雖然覓著無多，佢還係試著盡歡喜。其他人就無共樣哩，用細沙耙、細鑊頭摻圳溝底個泥沙耙落篩箕、畚箕肚篩篩仔，歸十隻蜆仔就在面前，覓著半面盆較加係平常個事情。也有人除了覓蜆仔以外，還用篩箕去插圳溝脣草竇肚個蝦蜚，轉去焗焗啊又係一盤菜。

吾同學最生趣，吾覓蜆仔就先用圳溝水洗頭那，等蜆仔覓好，頭那毛也燥哩，摻學老人講個「一兼二顧，摸蜆仔兼洗褲。」實在還相像哪！可惜毋記得幾時，吾姆就交代，這下家家屋屋個厝糟水就排到這圳溝肚，係行落去腳會綿忒，覓個蜆仔也食毋得，從該下以後，覓蜆仔伸著係佢兜朋友打嘴鼓個話題，無人識去覓哩。到這下，圳溝也奔忒吔，童年個種種，也共樣奔在吾個心肝肚。

*****今嘅日涯講到這，承蒙大家，恁仔細！*****

¹ 覓蜆仔：音 mi han\ e\；摸河蜆。

² 食著：音 siid zog\；吃穿。

³ 毋罅齊：音 m\ la ce\；不夠齊全。

⁴ 傢伙：音 ga\ fo\；工具。

⁵ 著著獎券：音 cog do\ jiong\ kien\；中獎。

⁶ 一晝邊：音 id\ zu bien\；一個下午。